

四庫全書

集部

欽定四庫全書

集部

宋詩紀事卷二十三

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣朱圻

謄錄監生臣潘璣

欽定四庫全書

宋詩紀事卷二十二

錢塘厲鶚撰

王觀

觀字通叟高郵人

一作如皋人

嘉祐二年進士累遷

大理丞知江都縣嘗著揚州賦及芍藥譜

莫惱翁

穀垂乾穗豆垂角雨足年登不勝樂烏巾紫領銀鬚長
白酒滿杯翁自酌翁醉不知秋色涼兒將翁鬚孫撼牀

莫惱翁翁年已高百事慵

竹坡詩話此詩可與張文昌爭衡

李渤

渤字子文樂昌人嘉祐二年進士官至朝奉郎

知白州

韶州府志渤世業儒有聲嶺表郡人號李夫子
嘗試南昌作聞伯夷之風頑夫廉賦人稱為李
伯夷

武溪

扁舟初汎入瀧船隱約乘槎上漢年岸狹東成三級浪
山高分得一毫天掃開盤石那無酒流出桃花恐有仙
青史若能留姓字直須來此釣溪烟

韶州府志

邨 亶

亶字正夫太倉人嘉祐二年進士初授睦州團
練推官除司農寺丞提舉兩浙水利元祐初為
太府寺丞出知温州卒有吳門水利書

鍾山訪王荊公

時遣其子僑就學

十里松陰蔣子山暮烟收盡梵宮寬夜深更向紫微宿
坐久始知凡骨寒一派石泉流沆瀣數庭霜竹顫琅玕
大鵬汎有搏風便還許鷦鷯附羽翰

中吳紀聞

王回

回字深父福州侯官人嘉祐二年進士補亳州
衛真縣主簿歲餘自免去治平初以薦知南頓
縣命下而卒有集

浙江有感

候潮門外浙江西曾憶浮舟自此歸萬古波濤今日是
一身蹤跡昔人非愁侵壯齒頭先白淚入秋風眼易眵
日暮彷徨不能去連隄疎柳更依依

咸淳臨安志

呂大鈞

大鈞字和叔大防弟嘉祐二年進士乙科終于
廊延路漕司屬官從橫渠張子學有誠德集

曾點

函丈從容問且酬展才無不至諸侯可憐曾點推鳴瑟

獨對春風詠不休

宋文鑑

黃通

通字介夫邵武人嘉祐二年進士除大理寺丞

元夕

春樓十二玉梯橫紫府千門夜不扃疑是嫦娥弄春色

彩雲移下一天星

邵武府志

劉輝

輝元名幾字之道鉛山人嘉祐四年進士第一

官大理評事有東歸集

文獻通考陳氏曰煇文體奇澀歐陽公惡之下第及是在殿廬得其賦大喜既唱名乃煇也公愕然堯舜性仁賦至今傳誦

與客遊太平僧舍

兩道翠陰迎騎合
四圍清氣逼人來
林端有路雲千級
物外忘機酒一杯

翰府名談

豐稷

稷字相之明州鄞人嘉祐四年進士徽宗朝歷

官御史中丞工部尚書兼侍讀以樞密學士出
守越州入元祐黨籍安置台州徙建州卒建炎
中追復學士謚清敏

運司園亭詩

和章質夫

玉谿堂

一水從何來應是崑山頂醺成綠玉池虛堂逗清影公
退冷然賞了非心外境魚泳陽光動鳥啼春晝永

潺湲亭

養源在西山如玉抱精白引之落錦渠歷耳不可擇風
雨雜鳴球珠璣寫雲液恰似偃溪聲醒悟迷途客

以上成都

文類

題朱樸隱居天和堂

路左漿先饋門前屨幾重勇歸塵事擲恬處道心濃弄
水知幽谷觀雲想妙峯夜深孤鶴唳清露滴高松

至元嘉禾

志

駕幸太學

鳳幄雲開日月光
九霄鳴蹕下虞庠
朝元進士鴻成列
拱極名臣玉照行
問道賈生稱五學
乞言戴聖美三王
上心夙悟周公戒
天下安危自一堂

中州題詠集

朱長文

長文字伯原其先越州剡人家吳郡嘉祐四年
進士授祕書省校書郎改許州司戶參軍充蘇
州教授築室郡西表曰樂圃鄉人稱為樂圃先
生紹聖閒除祕書省正字兼樞密院編修卒有

樂圃文集

避暑錄話元豐間淮浙士人以疾不仕因行義聞鄉里者二人楚州徐積仲車蘇州朱長文伯原仲車以輦伯原以跛

奉陪太守及諸公遊虎丘

何必襄陽孟浩然苦吟自可繼前賢虎丘合去十二度

見白公詩熊軾再遊三百年雲閣為君追舊額飛雲閣本名齊雲樓今追

復之霓裳從古播朱弦白公在蘇作霓裳曲此行不減唐人樂暢飲

惟無八酒仙

次梅評事韻

餅盞蕭灑似村家任有羸金豈足誇自入醉鄉頭不白

新詩何用祝蒼華

以上樂圃餘稿

胡宗愈

宗愈字完夫常州人宿從子嘉祐四年進士哲

宗朝歷尚書右丞終吏部尚書

寄題錢公輔衆樂亭

平湖拍岸海潮通亭在平湖杳靄中花豔含春雲島晚

波光照夜玉壺空動搖人影雙橋月洗滌塵襟四面風
野老半酣亭下笑漁樵今日與民同

延祐四明志

章惇

惇字子厚浦城人嘉祐四年進士元豐中歷門
下侍郎哲宗即位遷知樞密院事左僕射兼門
下侍郎遷特進封申國公徽宗朝責潭州安置
再貶雷州司戶參軍徙湖州居住

揮麈餘話章惇之父俞卨公族子早歲無行妻
之母楊氏早寡俞與之通已而生子以一合置

水絨置其內持以還俞俞得之云此兒五行甚佳將大吾門既長登第即惇也東坡先生送其出守湖州詩云方丈仙人出淼茫高情猶愛水雲鄉惇以為譏已怨之紹聖中為相坡渡海蓋修怨也

遊虎丘次韻

闔閭城外小層巒瘦竹寒松數里間並岸逢僧知近寺
入門鑿石漸登山純鉤劍化空池在幽獨詩成白日閒
遊客幸無官事束何須齋舫斂昏還

和蒲宗孟遊虎丘山書錢唐舊遊

傳聞城角艤行舟自擁笙歌選勝遊偶為寒江阻潮汐
再容清賞矚林丘燕回吳苑風和雪夢斷錢塘月滿樓
盡把蘇杭好烟景醉吟將去詫東州

以上吳郡志

題李邦直家江行初雪圖

江頭微雪北風急憶泊武昌舟尾時潮來浪打船欲破
擁被醉眠人不知

退齋閒雅錄

過石槽鋪

在邵陽

瘴癘潛銷瑞氣和梅峯千里潤烟蘿人逢雙堠雖云遠

路在好山寧厭多

方輿勝覽

梅山歌

開梅山開梅山梅山萬仞摩星躔捫蘿鳥道十步九曲
折時有僵木橫崖巔肩摩直下視南岳迴首蜀道猶平
川人家迤邐見板屋火耕硤确多畬田穿堂之鼓堂壁
懸兩頭擊鼓歌聲傳長藤酌酒跪而飲何物爽口鹽為
先白巾裏髻衣錯結野花山果青垂肩如今丁口漸繁
息世界雖異如桃源熙寧天子聖慮遠命將傳檄令開

邊給牛貸種使開墾植桑種稻輸絹錢不持寸刃得地
一千里王道蕩蕩堯為天大開庠序明禮教撫柔新俗
威無專小臣作詩備雅樂梅山之崖詩可鐫此詩可勒
不可泯頌聲千古長潺潺

湖廣總志長沙國漢高帝始王吳芮芮將梅鎔
時以益陽梅林為家號梅山後為蠻王扶氏據
之至宋熙寧六年章惇諭平五寨分其地為二
始以下梅山地安化縣屬武安軍惇有梅山歌
云云

張芻

芻字聖民嘉祐四年進士官度支員外郎守登
州又為淮南轉運使

題招提院靜照堂

檇李舊禪扉叢林自翠微寺居天外靜僧向日邊歸野
水涵齋几閒雲宿釣磯庭前祖來意誰為柏依依

至元
嘉禾

志

陸伸

題招提院靜照堂

閒房增締構宴坐隔囂埃屋木不加飾庭花時自開虛
明殊止水寂絕等寒灰齋外無餘事欣逢高士來

至元
嘉禾

志

徐徽

徽字仲元滁州人嘉祐四年進士歷官提舉利
州改常平抗疏致仕居獨山號獨山翁編滁陽

慶歷集

襄城

昨土分茅奠此岡金根玉輅總輝光誰知三百餘年後
老樹殘蟬送夕陽

滁陽志

蔡確

確字持正晉江人嘉祐四年進士歷知制誥御
史中丞參知政事元豐五年拜尚書右僕射兼
中書侍郎哲宗立轉左僕射元祐中罷知陳州
奪職徙安州又徙鄧州坐譏訕責英州別駕新
州安置

題王維江行初雪畫

吳兒龜手網寒川，急雪鳴蓑浪拍船。
青弋渡頭曾臥看，令人卻憶十年前。

聲畫集

春日

十二天街雨壓沙，秋千咿喔響人家。
東風會勸十分酒，寒食初開百玉花。
年少斬新金絡馬，柳陰無數畫輪車。
春來誰道遲遲日，尤覺春來日易斜。

後村千家詩

崇政殿放榜

黃帕開封出奏篇銀袍二百玉階前威顏咫尺瞻中宸
名姓傳呼下九天宮墨旋題黃甲字禁門已簇杏花韉
孤臣拜賜交悲喜相望光芬十五年

合璧事類前集

楊花

楊花三月暮撩亂送春歸盡日閒相逐無風亦自飛輕
輕攔乳燕故故撲征衣莫上高樓望徘徊滿落暉

合璧事類

別集

悼侍兒

鸚鵡言猶在琵琶事已非傷心瘴江水同渡不同歸

侯鯖錄持正謫新州侍兒從焉名琵琶常養一鸚鵡甚慧丞相呼琵琶叩扣一響板鸚鵡傳言呼之琵琶逝後誤扣響板鸚鵡猶傳言丞相大慟感疾不起嘗為詩云云

夏日登車蓋亭

公事無多客亦稀朱衣小吏不須隨溪潭直上虛亭裏
臥展柴桑處士詩

一川佳景踈簾外四面涼風曲檻頭綠野平流來遠棹
青天白雨起靈湫

紙屏石枕竹方牀手倦拋書午夢長
睡覺莞然成獨笑
數聲漁笛在滄浪

苔溪漁隱叢話蔡確守安州夏登車蓋亭作十絕句為吳處厚箋注得罪調新州其一絕云云殊有閒適自在之意

靜中自足勝炎蒸
入眼兼無俗物憎
何處機心驚白鳥
誰人怒劒逐青蠅

西山髣髴見松筠
日日常來看色轉
新聞說桃花巖石畔
讀書曾有謫仙人

風搖熟果時聞落雨滴餘花亦自香
葉底出巢黃口鬧
波閒逐隊小魚忙

來結芳廬向翠微自持杯酒對清暉
水趨夢澤悠悠過
雲抱西山冉冉飛

矯矯名臣郝甑山忠言直節上元閒
古人不見清風在
歎息思公俯碧灣

溪中曾有戈船士溪上今無佩犢人
病守儵然唯坐嘯
白鷗紅鶴伴閒身

喧厯六月浩無津行見沙洲束兩濱如帶溪流何足道
沈沈滄海會揚塵

堯山堂外紀蔡確以弟碩賦敗謫守安州夏日
登車蓋亭作此十絕時吳處厚知漢陽軍箋注
以聞其畧云五篇涉譏諷何處機心驚白鳥誰
人怒劔逐青蠅以譏讒譖之人葉底出巢黃口
開波閱逐隊小魚忙譏新進用事之人睡起莞
然成獨笑方今朝廷清明不知確笑何事矯矯
名臣郝甑山忠言直節上元間按郝處俊封甑
山公唐高宗欲遜位天后處俊上疏諫此事正
在上元三年今皇太后垂簾遵用章獻明肅故
事確指武后以比太后沈沈滄海會揚塵謂人
壽幾何尤非佳語宣仁盛怒令確分晰終不自
明遂貶新州

楊傑

傑字次公無為軍人嘉祐四年進士元祐中歷
禮部員外郎出知潤州除兩浙提點刑獄卒有
無為集

勿去草行

勿去草草無惡若比世俗俗浮薄君不見長安公卿家
公卿盛時客如麻公卿去後門無車又不見千里萬里
江湖濱觸目悽悽無故人唯有芳草隨車輪一日還舊

居門前草先鉏草與主人實無負主人于草宜何如勿
去草草無惡若比世俗俗浮薄

謝公約惠墨竹圖

幽人噴墨寫成竹變化琅玕作玄玉公約贈我兩大軸
不比丹青凡草木六月都城苦炎燠車馬紛紛正馳逐
曲臺官冷晝掩闕淨埽虛堂展寒綠簾閒忽有微風來
不動纖枝清滿屋憶得扁舟載雪時曾寄會稽江上宿

二妃廟

黃陵二妃廟客過動愁顏湘水有時盡帝車何日還
斑千畝竹魂斷九疑山欲問蒼梧事白雲生棟閒

以上無為

集

雨花臺

梁武帝時有雲光法師講經于此

空書來震旦康樂造淵微貝葉深山譯曼花半夜飛香
清雖透筆藥散不需衣舊社白蓮老遠公應望歸

六朝事蹟

淨居寺

在建昌新城縣南

達人到岸不須船留寄寒雲幾百年欲問上方多少遠

為言先過淨居天

輿地紀勝

西湖參寥山房

我愛參寥一味閒，巖房占得畫屏間。
斫開東廡數枝竹，放入西湖十里山。
石底酌泉清徹骨，門前逢客強為顏。
白雲幽鳥應相信，出本無心倦即還。

咸淳臨安志

元祐元年六月十六日還自海上入佛日山淨慧
道場瞻禮懷禪師塔時長老弼公即阿育王大覺
禪師之嗣也送予出山酌甘泉而別因留詩

珊瑚

佛日山前水行人甘露杯須知源派遠直自四明來

鐵網

劉 祕

祕官奉職與楊次公倡和

贈傳神歐陽价

筆妙今為第一人心期造化奪天真精神形骨從來一
移入青鱗似兩身

古今詩話

李 顥

舟泊太湖

旋經義興境頓棹石蘭渚震澤為何在今惟太湖浦圓
經縈五百盼目眇無覩高天淼若岸長津雜如縷窈窕
尋灣碕迢遞望巒嶼驚飈揚飛湍浮霄漾懸岨輕禽翔
雲漢遊鱗憩中泚黯靄天時陰曉巖舟航舞馮河安可

馴靜觀戒行旅

震澤編

關景仁

景仁字彥長錢唐人魯之子嘉祐四年進士

贈小蘇

昔日聞蘇小今朝見小蘇未知蘇小貌得似小蘇無

泗上錄元居中作宿守郡有官妓小蘇善歌舞
令就座客闕彥長求詩贈之云云

李定

定字資深揚州人舉進士元豐閒官御史中丞
哲宗朝謫居滁州

詩話總龜李定字仲求洪州人又李定字資深
揚州人元豐中御史中丞又李定濟南人嘉祐
中老于正卿同姓名者凡三人

老學菴筆記潘子賤題蔡奴傳神云嘉祐間風塵中人亦如此嗚呼盛哉蔡寶元豐中人也仇氏初在民間生子為浮屠曰了元即佛印禪師又為廣陵國子博士李問妾生定出嫁邵氏生蔡奴故京師人謂蔡奴為邵六東軒筆錄司農少卿朱壽昌在襁褓所生母被出治平中棄官入關中尋訪得于陝州蘇子瞻作詩序且譏切世之不養者李定見之大惋恨會為中丞劾軾作詩訛謗將致不測賴上保持之止黜為黃州團練副使

海棠

輕紅如杏素遮梨直似佳人照碧池
已是化工教豔絕
莫嫌青帝與開遲
烟滋綽約明雙臉
雨借妖饒入四支

西蜀有名須得地瓊林高壓百花奇

海棠譜

琴溪

芳草茸茸襯馬蹄兩陪憲節過琴溪東風又屬梨花月
膏雨新調燕子泥郵舍亭空蒼蘚合釣臺人去暮雲棲
此行不憚驅馳遠千里江山入品題

寧國府志

邵雍

雍字堯夫河南人嘉祐中詔求遺逸授將作監
簿復舉逸士補潁州團練推官稱疾不起名其

居曰安樂窩自號安樂先生元祐中諡康節有

擊壤集

安樂窩

半記不記夢覺後似愁無愁情倦時擁衾側臥未欲起
簾外落花撩亂飛

聞見前錄司馬溫公愛此詩請書紙簾上

謝司馬君實諸公買園

重謝諸公為買園買園城裏占林泉七千來步平流水

二十餘家爭出錢嘉祐卜居終是僦熙寧受券遂能專
鳳凰樓下新閒客道德坊中舊散仙洛浦清風朝滿袖
嵩岑皓月夜盈軒接羅倒戴芰荷畔談塵輕揮楊柳邊
陌徹銅駝花爛漫隄連金谷草芊綿青春未老尚可出
紅日已高猶自眠洞號長生宜有主窩名安樂豈無權
敢于世上明開眼會向人間別看天盡送光陰歸酒盞
都移造化入詩篇也知此片好田地消得堯夫筆似椽

聞見前錄康節先公慶歷間過洛愛其山水風
俗之美始有卜築之意至皇祐元年洛人爲買

宅于履道坊西天慶觀東康節復還葉縣嘉祐
七年王宣徽尹洛就天津橋南五代節度使安
審琦故宅基為屋三十間請康節還居之富韓
公命其客孟約買對宅一園皆有水竹花木之
勝熙寧初行買官田之法天津之宅亦官地勝
三月人不忍買諸公曰使先生之宅他人居之
吾輩蒙恥矣司馬溫公而下集錢買之先生以
詩謝溫公諸公云云今宅契司馬溫公戶名園
契富韓公戶名莊契王郎中戶名康節初不改
也

寄呂獻可

一別星霜二紀中升沈音問不相通林間談笑須歸我
天下安危且係公萬乘几前當蹇諤百花洲上畧相從

不知月白風清夜能憶伊川舊釣翁

和司馬君實過天津居

風背河聲近亦微斜陽淡泊隔雲衣一雙白鷺來烟外
將下沙頭卻背飛

春遊吟

人間佳節惟寒食天下名園重洛陽金谷煖橫宮殿碧
銅駝晴合綺羅光橋邊楊柳細垂地花外秋千半出牆
白馬蹄輕草如剪爛遊于此十年狂

小車吟

自從三度絕韋編不讀書來十二年大斃子中消白晝
小車兒上看青天閒為水竹雲山主靜得風花雪月權
俯仰之間無所媿任他人謗似神仙

以上擊壤集

張嶠

嶠字子望滎陽人與兄岫同登進士受學于邵

康節

洛陽觀花

平生自是愛花人到處尋芳不遇真祇道人間無正色
今朝初見洛陽春

王直方詩話此詩蓋託意卽堯夫

曹確

確常州人嘉祐四年進士

題季子墓

人間不記吳王事江上今存季子宮壞壁亂飄青蘚雨
破檐時蕩白榆風衣冠何處堆春草雞酒長年任野翁

下馬一看思舊德浮名應與暮雲空

咸淳毘陵志

程珣

珣字伯溫西洛人兵部侍郎羽之曾孫以祖任
為郊社齋郎嘗知龔鳳磁漢四州積遷大中大
夫

漢州作

濯纓泉潔存遺跡促軫亭空想舊風公暇未應無客會
春遊更喜與民同

方輿勝覽

程顥

顥字伯淳珣之子舉進士神宗朝以薦為太子中允監察御史裏行罷知扶溝縣責監汝州鹽稅卒文潞公題其墓曰明道先生嘉定中追諡曰純封河南伯從祀宣聖廟庭有明道集

林下偶談山谷稱周濂溪習次如光風霽月又云西風壯士淚多為程顥滴東坡為濂溪詩云夫子豈我輩造物乃其徒蓋蘇氏師友未嘗不起敬于周程如此惜乎後因嘻笑而成仇敵也

長嘯巖中得冰以石敲食甚佳

車倦人煩渴思長巖中冰片玉成方老仙笑我塵勞久
乞與雲膏洗俗腸

送呂晦叔赴河陽

曉日都門颭旆旌晚風鐃吹入三城知公再為蒼生起
不是尋常刺史行

西湖

溪水橋邊鴨子波樓臺只在郡城西煙波乍見心先快
島嶼將尋路欲迷盡日無風橫舴艋有時經雨飲虹霓

如何咫尺塵埃地不使遊人續杖藜

陳公廩園修禊事席上賦

盛集蘭亭舊風流洛社今坐中無俗客水面有清音香篆來還去花枝泛復沈未須愁日暮天際是輕陰

以上河南

程氏文集

顏復

復字長道太初子嘉祐中訪有道之士京東部使者以復應詔賜進士為校書郎元祐中累官

國子祭酒天章閣待制卒

寄雲門靈運禪師

雲門山嶺樛葉青雲門山下陰溪鳴山翁毀服悖世榮
此心圓靜無能名松間一飯養槁形石壁幾見秋苔生
愛山不免搜其情掇拾短闕成長行施子傳來竒可驚
爽閭空谷天外聲高峯擺蕩疑莖英

雲門集

劉 摯

摯字莘老永靜東光人家于東平嘉祐中擢甲

科神宗朝累遷禮部侍郎哲宗即位歷官門下
侍郎以觀文殿大學士出知鄆州紹聖初以黨
論貶光祿卿分司南京再貶鼎州團練副使新
州安置卒紹興中贈少師諡忠肅有集

孫少卿鹿頭山詩并畫圖

使君真愛鹿頭山圖畫歌吟共為傳塵世那知武陵事
時人爭誦永嘉篇行春游醉常勞夢按部登臨又隔年
有客平生志林壑坐憐雙眼隔雲烟

聲畫集

夜直中書省寄左丞子容公

膺門早歲預登龍，儉幕中間託下風。
敢謂彈冠煩貢禹，每思移疾避胡公。
論文青眼今猶在，報國丹心老更同。
夜直沈迷坐東省，齋居清絕望南宮。

卻婦編蘇子容留守南都萃老時為判官蘇大
器愛之後同秉政因祠事各居本省致齋寄語
云云

湖上口號

綠荷深不見湖光，萬柄清風動晚涼。
莫恨細葩猶未爛，

葉香元是勝花香

能改齋漫錄

易元吉畫猿

榭林秋葉青玉繁枝間倒挂秋山猿古面睢盱露瘦月
毵毛勻膩舒玄雲老猿顧子稍留滯小猿引臂勞攀援
坐疑跳擲避人去彷彿悲嘯生壁間巴山楚峽幾千里
寒巖數丈移秋軒渺然獨起林壑志平生願得與彼羣
吾知畫者古有說神鬼為易犬馬難物之有象衆所識
難以偽筆淆其真傳聞易生近已死此筆遂絕無幾存

安得千金買遺紙真偽常與識者論

聲畫集

絳帳臺

在江陵東漢馬融教授弟子于此

馬融號耆舊太守南郡來橫經坐絳帳自處何崔嵬帳

前列徒弟帳後歌管陪書生貧賤志遽以聲色回

方輿勝覽

王巖叟

巖叟字彥霖大名清平人仁宗初置明經科鄉

舉省試廷對皆第一元祐中拜簽書樞密院事

罷為端明殿學士出知鄭州徙河陽卒紹聖中

坐黨論追貶雷州別駕有大名集

柳絮

銀毬拋出翠烟深聚散高低不自禁飄去長教迎暖日

飛來深院怯春陰

全芳備祖

和公齊臨替有感見寄

孤宦邊城遇衆賢及瓜能不動依然風號古木葉堆地
雲攬遙山水拍天籬菊開時寒有信賓鴻過後暑無權

古今惜別君須念乘暇何妨倒酒船

瀛奎律髓

駕幸太學

享餘精意煥龍章就促鑾輿視上庠億萬園觀人作堵
三千迎拜士成行虛心訪道資洪業異禮尊儒冠百王
四海嚮風知自勸足應愚魯亦升堂

中州題詠集

揚州感舊懷古

隱隱蕪城枕碧流繁華曾是帝王州一聲水調滿明月
十里春風半畫樓白鳥不離圖上去江雲長在鑑中遊
廢興屈指千年事何異行人寄傳郵

揚州府志

陪孫之翰太博登成都樓

齷齪古之人傷心廣陵廢遂弦蕪城歌半夜一揮涕蕙
紉隨草衰藻黼歸塵翳魂石斂丘封歌堂從水逝薰光
杳沈滅吞恨徒千歲我懷吳蜀國禍亂若符契目覽臺
殿墟心感君王世干戈日馳逐狼虎爭吞噬山河寶天
塹城闕巍地腋霸力不久炎倏忽如焚薶空餘萬雉城
岌倚寒雲際麋鹿玩葦陰狐狸棲棘衛江漢含鳴咽岷
峨抱迢遞荒村烟火遙落日寒風厲因知朝市人自古

悲興替

全蜀藝文志

霧山

在邛州

霧山環合自雲川戶有青溪種玉田萬樹桃花不知處

幾人曾得問秦年

方輿勝覽

王俊民

俊民字康侯萊州掖縣人嘉祐六年進士第一

句

寒窗一夜雪紛紛來朔風之子動歸興輕袂飄如蓬問

子何所如家在濟水東問子何所學上庠教化宮

齊東野語世俗所謂王魁之事殊不經且不見
于傳記雜說疑無此事後見虞初志所集養生
必用方戒人不可妄服金虎碧霞丹云狀元王
俊民為應天府發解官得狂疾於貢院中嘗對
一石碑呼咩不已碑中若有應之者亦若康侯
之奮怒也病甚不省取書冊中交股刀自裁及
寸左右抱持之遂免出試院未久疾勢亦已平
復予與康侯有鄉曲之舊童稚共筆硯傳聞可
駭亟自汶擊舟抵彭城康侯亦起居飲食如故
但悵悵不樂歲暮予北歸康侯有詩送予云云
予既去徐醫以為有涎以碧霞金虎丹吐之積
久為寒中洞泄而死康侯父知舒州太湖縣遣
一道士來作醮書符傳道冥中語云五十年前
打殺謝吳留不結案有妄人托夏噩姓名作王

魁傳欲市利於少年狹邪輩其事皆不然

喬孝本

孝本嘉祐中福州簽判

題三山郡圃會稽亭

元給事絳建

元侯選勝重經營地取圍心正且平揆日募工踰再浹
創亭合樂落初成面開西向緣忠孝榜揭新封紀寵榮
隱隱湖山藏故國漫漫煙水隔都城低迷壘嶂回峯抱
繚繞芳叢列豔迎臺上臨風共瀟灑花間夢蛺助淒清

枕流小檻歌前沼散綺幽軒接後甍舊景周環如有待
夕陽偏照似多情縈紆碧沚通潮浦左右修篁拂畫楹
自昔甘棠雖足愛會稽從此擅佳名

淳熙三山志

孔文仲

文仲字經父臨江新喻人嘉祐六年進士哲宗
朝官中書舍人後入黨籍與弟武仲平仲有清
江三孔集

早行

客興謂已旦出視見落月瘦馬入荒陂霜花重如雪海
風吹萬里兩耳凍幾脫歲宴已苦寒近北尤凜冽況當
清曉行遡此原野闊笠飛帶繞頭指直不得結農家烟
火微炙手粗可熱豈能迂我留而就苟且活仰頭視四
宇夜氣亦漸豁苦心待正晝白日想不缺

宋文鑑

朱伯虎

伯虎字才元華亭人嘉祐六年進士官江東運

判

題佘山普照寺聰道人月軒

愛月開軒絕頂間
岿然巍剏壓層巒
翦除羣卉當簷盡
添得清光滿檻看
亂石雲堆秋色冷
老松風入夜聲寒
十年夢寐江鄉景
杖屨終期日倚闌

松江府志

曾宰

宰字子翊
第五弟嘉祐六年進士官舒州司

戶參軍湘潭縣主簿

舒州寄王介甫

官居隱几望瀟山不似茅簷舊日閒
顧我塵沙添白髮
憐君道路失朱顏
江涵秋老鱸魚美
岸入春風荻筍斑
此味總佳吾不樂
惟思一馬返鄉關

李壁王荆文公詩注予居撫州訪遺文於其孫
極止得此詩

許將

將字沖元福州閩人嘉祐八年進士第一神宗
朝累遷知制誥翰林學士紹聖初拜尚書左丞
中書侍郎徽宗朝進門下侍郎加觀文殿學士

告老為佑神觀使卒贈開府儀同三司諡文定

成都運司西園亭詩

和章質夫

雲峯樓

重樓起城陰乘高望西極列峯橫青天飛雪千里積疑
是空素山冬夏海中白莫怪頻東向上有思歸客

水閣

飛閣出方池修曲見空莽低臨化塢近平覺春波長返
景澄餘暉夕陰帶浮爽從容觀魚樂不減遊濠上

成都文類

沈括

括字存中錢唐人嘉祐八年進士編校昭文館書籍為館閣校勘熙寧中遷翰林學士龍圖閣待制坐事謫均州團練副使徙秀州復光祿少卿分司南京居潤州有長興集夢溪筆談

方輿勝覽沈存中宅在潤州朱方門外存中嘗夢至一處小山花如覆錦喬木覆其上山下有水夢中樂之後守宣城有道人無外者為言京口山川之勝郡人有地求售以錢三十萬得之又六年坐邊議謫官廬于潯陽元祐初道京口登所買地即夢中所遊處遂築室焉名曰夢

溪

延州詩

二郎山下雪紛紛
旋卓穹廬學塞人
化盡素衣冬未老
石煙都似洛陽塵

夢溪筆談鄜州延州境內有石油舊說高奴縣
出脂水即此也生於水際沙石土人以雉尾裹
之乃采入缶中頗似淳漆燃之如麻但烟甚濃
所需幄幕皆黑予疑其烟可用試掃其煤以為
墨黑光如漆松墨不及也遂大為之其識文為
延州石液者是也

嘗茶

誰把嫩香名雀舌定來北客未曾嘗不知靈草天然異
一夜風吹一寸長

夢溪筆談茶牙謂之雀舌麥顆言其至嫩也今
茶之美者新牙一發便長寸餘其細如針惟牙
長者為上品以其質幹土力皆有餘故也北人
不識誤為品題如雀舌麥顆極下材耳

陳丞相故宅

丞相旌旗久不歸虛堂寧止嘆伊威綠槐樓閣山蟬響
青草池塘野燕飛

夢溪筆談丞相陳秀公治第於潤州極為閑壯
池館綿亘數百步完成公已疾甚唯肩輿一登

西樓而已

潤州甘露寺

丞相高齋半草萊舊時風月滿亭臺地從日月生時見
天到江山盡處回三國是非春夢斷六朝城闕野花開
心隨潮水漫漫去流徧煙村半日來

歸計

住山人少說山多空只年年憶薜蘿不是自心應不信
眼前歸計又蹉跎

以上宋文鑑

開元樂詞

鵲鵲樓頭日暖蓬萊殿裏花香草綠烟迷步輦天高日
近龍牀

樓上正臨宮外人間不見仙家寒食輕烟薄霧滿城明
月梨花

按舞驪山影裏回鑾渭水光中玉笛一天明月翠華滿
陌東風

殿後春旗簇仗樓前御隊穿花一片紅雲闌處外人遙

認官家

侯鯖錄裕陵賞愛此詞

漢東樓

野草黏天雨未休
客心自冷不關秋
塞西便是猿啼處
滿目傷心悔上樓

方輿勝覽

光化道中遇雨

望遠初翻葉隨風
已結陰雨篷宜倦
枕鄉夢入寒衾莎
笠侵鄖俗溪山動
越吟烟波千里去
誰識魏牟心

錦繡萬花

金
谷

卷二十二

鞦韆

香入熏爐禁火天
芙蓉深苑鬪鞦韆
身輕幾欲隨風去
卻恨恩深不得仙

後村千家詩

在當塗作

鶚塘春水綠泱泱
謝市烟深柳線長
捲幔夕陽留不住
好風將雨過橫塘

輿地紀勝

秀州秋日

草滿池塘霜送梅。林疎野色近樓臺。天圍故越侵雲盡。
潮上孤城帶月回。客夢冷隨風葉斷。愁心低逐雁聲來。
流年又喜經重九。可意黃花是處開。

至元嘉禾志

仙都山

苔封輦路上。青山鶴馭遼天去。不還惟有銀河秋。月夜
鼎湖烟浪到人間。

仙都山志

蘇小小墓

古木寒鴉噪夕陽。六朝遺恨草茫茫。水如香篆船如葉。

咫尺西樓不見郎

嘉興府志補

江南曲

新秋拂水無行跡
夜夜隨潮過江北
西風卷雨上半天
渡口微吟含曉碧
城頭鼓響日腳垂
天際籠煙鎖山色
高樓索莫臨長陌
黃竹一聲無北客
時平田苦少人耕
惟有蘆花滿江白

宋藝圃集

遊花山寺

經旬飄雨喜新晴
病馬衝泥取次行
老態只應隨日至

春心無意與花爭
山川滿目浮烟合
樓閣侵天暮靄橫
嗟我有身無處用
強攜樽酒入崢嶸

鎮江府志

袁默

默無錫人嘉祐八年進士

與剛中適甫遊惠山

雨過山前翠欲飛
水雲高下正含暉
魚跳細浪千花碎
蟬倚清陰一嘒微
沈李浮瓜吟齒盡
清風明月滿船歸
超然不負尋幽興
拂得荷香在葛衣

惠山集

蘇唐卿

唐卿官寺丞宰費縣善小篆嘉祐中嘗書歐陽
文忠公醉翁亭記刻石於費之縣齋記後有倡
和詩

唐卿既篆歐公侍郎滁州琅琊山醉翁亭記上石訖
思莫能致之滁上因斧官之隙地衆材堪梁棟者枝
其榱桷構堂於廡舍西偏高三仞植記於中楹若屏
然圖悠久也因成長句五十六字兼寄獻歐公侍郎

醉翁亭記醉翁堂遠取琅琊即費鄉高世雄文刊翠琰
老山孤幹負虹梁左鄰鼇海三神島西倚儒宮數仞牆
雖媿篆工非墨寶英辭終與借輝光

篆書醉翁亭記石
刻

龔 敦

敦鄉貢進士

和

滁守南遷記醉狂篆刊移近舞雩鄉當年寓興臨山水
今日希風構棟梁吏部喪文辭避席陽冰閣筆讓循牆

東沂從此遺聲迹迴掩桐廬翰墨光

范公希文守桐廬嘗作嚴先生祠堂

記邵先生篆以刊石光絕一時

篆書醉翁亭記石刻

邵忱

忱鄉貢進士

和

歐公頃歲守滁陽題記蒼顏入醉鄉賢宰特將刊古篆

舊碑不免棄山梁

舊碑乃陳
知明所書

軒楹別構如安屏筆札難

通似面牆異日智仙來輦去退蒙從此謝聲光

退蒙乃
知明字

篆書醉翁亭記石刻

史辭

辭武昌人

和

昔日歐公鎮永陽構亭直在水雲鄉
醉翁嘯傲曾為記
賢宰風流別架梁
老筆健道刊琬琰
晴嵐滴瀝照門牆
更吟新詠深堂祕
相伴崑山片玉光

篆書醉翁亭記石刻

張頌

頌為登州防禦判官

和

重惜歐公滁記好模刊翠琰費堂新
文華起焰衝星斗篆法通靈動鬼神
觀妙每多師道客仰高常有慕賢人
璨然輝目如辰象不朽宜為萬世人

篆書醉翁亭記石刻

宋詩紀事卷二十二

欽定四庫全書

宋詩紀事卷二十三

錢塘厲鶚撰

范祖禹

祖禹字淳父鎮之從孫嘉祐八年進士甲科哲
宗朝累擢右諫議大夫遷給事中拜翰林學士
出知陝州貶謫以終有范太史集

資山

在資陽縣治平中宰龍水作

資山巖谷多神仙鸞車鳳馬隨飛煙神女蕭蕭來暮雨

浮丘徃徃下雲輶

龍水縣齋作

縣門倚巖石終日對青峯
初仕借為宰讀書過三冬
忘機狎鷗鳥觀稼親老農
訟庭可羅雀銅印苔蘚封

月夜船行入資州

憶昨臥碧山蒼蒼叢桂間
白雲為屏石為枕綠蘿長挂
明月閒忽乘輕舟泛江水
山月隨人還在此白鷺驚飛
宿靄間青山倒臥蒼波底
此時孤櫂發中流川后停波

聽櫓謳不學子猷中夜返欲乘明月向資州

資州路東津寺

山行無晨暮日暝崖谷昏哀猿落客淚永路驚旅魂憑
陵高山巔俯視大江奔迴環島嶼合縈轉洲渚屯行雲
赴楚天飛鳥下蜀門地遐怪物聚寺古深殿存憶昔李
氏末煙塵暗中原姦雄競草竊割據窮海根干戈百年
後見此敗屋垣我來屬清秋登覽無俗喧山深虎豹歸
水靜蛟鼉騫臨風獨嘯吒浩蕩欲飛翻

以上范太史集

李方叔送長沙貓頭筍作詩為貺

穿雲斲石遠林空來涉烟波萬萬重實比梧桐能食鳳
籜翻風雨便成龍一枝不許塵鞍挂千畝終留渭水封
陋巷菜羹知不忝君王玉食願時供

李薦師友談記

孔武仲

武仲字常父嘉祐八年進士元祐中歷官禮部
侍郎出知洪宣二州坐黨籍奪職居池州卒

鄂州

綠柳陰陰蔽武昌汀洲如畫引帆檣一江見底自秋色
千里無風正夕陽暫別勝游渾老大追思前事只淒涼
賢豪況有遺蹤在欲買溪山作漫郎

張東叔出紫雲回鑾圖以示坐客因為賦之

開元太平無兵戎真人味道希夷中人間之樂已饒足
唯有青霄未追逐坐中誰似葉先生以氣為糧常辟穀
朝登員嶠夕崑崙只與神游不要人忽逢邀攜看月去
縹緲虛空生紫雲蟾宮竟不容久住仙樂飄飄送回去

歸來宮漏未移更甲帳明缸宛如故汾水悲歌仙不成
梨園空沒有遺聲紅塵如海漲朝市從此無人游玉京
以上三孔清江集

郭附

附字明仲吳郡人嘉祐八年進士知洪州新建
縣後以朝奉大夫致仕

吳郡志明仲致仕後幅巾策杖窮山林詩酒之
適十八年東南高士皆願從游

楓橋

師子山雲漠漠越來溪水悠悠鐘到客船未曉月和漁
火俱愁咫尺橫塘古塔連綿芳草長洲一老翛然自在
時時來繫扁舟

吳郡志

周 邠

邠字開祖錢唐人嘉祐八年進士元豐中為漂
水令仕至朝請大夫輕車都尉蘇軾倅杭多與
酬倡所謂周長官者是也

新月

落照西山夜色浮
彎彎寒挂碧雲頭
寶奩新樣橫眉黛
珠箔斜懸半額鉤
丹桂一枝初淺露
金波千里未圓流
嬋娟三五纔成魄
散滿清光四百州

合璧事類前集

訪慧山錢道人不過

登山穿破亂雲堆
不見高人眼倦開
門掩水聲閒白日
路無車跡長蒼苔
牆頭五柳空搖曳
池上雙鳬自往來
卻懼扁舟自回去
過江思上子陵臺

咸淳毘陵志

湖中聞有美堂上歌笑聲寄蘇公

堂上歌聲想遏雲主人休整碧紗帟妝殘粉落顰脂暈
飲劇杯深琥珀紋簪屐定知高楚客笑談應好卻秦軍
莫辭上馬玉山倒已是遲留至夜分

聞蘇公獨游淨慈謁本長老以詩奉寄仍邀遊靈
隱

放歸騶騎獨尋山直入青蘿翠靄間謝客杖藜方自適
阮公蠟屐許誰攀何愁白髮能添老須信黃金不買閒
應向林泉真得趣徜徉終日未經還

以上咸淳臨安志

曹輔

輔字子方華州人登嘉祐八年乙科官提點廣南西路刑獄福建轉運使朝奉郎守司勳郎中號靜常先生

因學紀聞攻媿跋曹子方書以為祐陵時上書論時事靖康至樞筦愚謂有兩曹輔其一字子方與蘇黃游若論事為樞筦者字載德龜山為銘合為一人非也

次韻无咎戲贈蕙呈同舍諸公

少年落魄走四方看山聽水興難忘
深林誰復知孤芳

十載江湖稱漫郎紫溪風月幽思長綠水如鏡煙蒼蒼
追隨豪雋多清狂春風爛醉胥山堂下瞰羣峯聳如槍
吳儂棹歌笛靈羌攀蘿捫壁疲獲臧經旬選勝行齋糧
客兒經臺倚高岡共臥明月吟胡牀投身忽落崑崙傍
征西萬馬隨騰驤官軍夜半填賊隍食盡師老催歸裝
將軍數竒漫鷹揚斬捕不能酬失亡曲突徙薪語莫償
幕中病客非智囊扁舟夷猶憶吳鄉晁侯平日丈人行
生駒今始見驕驕伯樂一盼過老商恐是稟質蒼龍房

尤工吳語放降王叔敖抵掌對燭光秋英落盡金鈿黃
玉甕浮春醅潑香九天廣樂來新涼笑談聊此共一觴
天街六翮將翱翔正值羿鼓遊中央我老委翅無復望
洞庭橘熟千林霜行當拂衣解銀章買取百花洲畔莊
世外日月何曾忙翛然一室生吉祥車馬還能過我牆
夜具茗飲與柘漿更看君詩雲錦張

同文館倡和詩

上祖擇之龍學

此生飄泊任乾坤南北東西豈更論萬里欲封防墓土

十年重到李膺門少驚人事時千變盡付羈愁酒一樽

主上思賢厚風俗如公終未老丘園

祖龍學集附

題白氏莊

白序字聖均自言白侍郎之後有莊在樊川

浮雲萬態變朝昏疊嶂尋常翠滿門錦里先生多勝事

香山居士有賢孫春風樓閣聞碁響晚雨池塘見屐痕

寄謝世間無此樂起予歸興憶江村

陝西通志

松江亭

塵路長迷眼江亭一散襟始驚天地闊更覺水雲深點

點鷺鷥影疎疎橘柚林扁舟他日興誰共此登臨

吳江縣志

遊劉道人巖

故老能將舊事傳仙翁蹤迹向依然方知物外壺中景

隱隱烟霞有洞天

粵西詩載

陳軒

軒字元興建陽人嘉祐八年進士元豐間知汀州元祐中為中書舍人至龍圖閣學士

題志添禪師

車輪馬足走塵烟競看成都萬炬然獨我踏開亭下雪

伴師同坐一菴禪

補續高僧傳

汎青溪

曉煙如練曳平津一櫂東風兩岸春島鷺沙鷗休戀我

北堂歸有白頭親

嚴州府志

題蓬萊觀

白鵝乘去人何在青鳥飛來信已遙若使何郎有仙骨
也須同引鳳凰簫

汀州府志寧化劉氏女生不茹葷美而慧以不嫁自誓父母許石城何氏子卜吉聚族往送之甫越境白鵝從天下乘之飛去衆共矧祠郡以狀聞賜為蓬萊觀守陳軒題詩觀中

馬默

默字處厚單州成武人第進士調臨濮尉知項城縣治平中以薦為監察御史神宗朝累官戶

部侍郎寶文閣待制告老提舉鴻慶宮卒入元

祐黨籍

孔平仲談苑馬默為臺官彈奏輕薄劉貢父曰既云馬默不合驢鳴

思郭真人

郭也三峯秀文章似性淳汶陽初識面謂我舊相親題
詩叙游隱於今經幾春有家歸未得西望涕霑巾

陶朱新錄

王臨

臨字大觀大名成安人舉進士治平中歷戶部
副使以寶文閣待制知廣州府徙河中卒

題司空表聖王官谷

夫君久逐夜舟移依舊巖扃鎖翠微位至文昌還避世
身甘幽谷是知機清風未泯隨流水遺像空存伴落暉

百有餘年同俯仰白雲猶繞故亭飛

熙寧壬子六月二十日書王官谷

集

潘興嗣

興嗣字延之慎修之孫丁謂之甥家新建以廕授將作監主簿初調德化尉投劾去築室豫章城南自號清逸居士熙寧初召為筠州推官辭不就文集及詩話補遺

戲郭功甫

休恨古人不見我猶喜江東獨有君
盡怪阿戎從幼異人疑太白是前生
雲間鸞鳳人間現天上麒麟地上行
詩律暮年誰可敵筆端談笑埽千兵

潘子真詩話袁世弼南昌人宦游當途時功甫尚未冠也世弼愛其才薦於梅聖俞自爾有聲功父嘗謂吾大父清逸云數載汲引梅二丈力也蒿埋三尺不敢忘其賜功甫既壯頗恃其才下筆曾不經意論者或惜其造語無刻厲之功清逸云如功甫豈易得但置作者中便覺有優劣耳清逸嘗有詩戲之云云

題濂溪

鱗鱗負郭田漸次郊原口其中得清曠貴結林泉友一
溪東南來潄澹翠波走清響動靈粹寒光生戶牖
峩峩雙劍峯隱隱插牛斗疎雲互明晦嵐翠相妍醜恍疑座
中客即是關門叟為歌紫芝曲更擊秦人缶
窅然忘得喪形骸與天偶君懷康濟術休光動林藪
得非仁知樂夙分已天有捉鼻固未免安能混真守
日暮車馬徒橋橫莫回首

廬山紀事

滕王閣春日晚眺

重疊西屏對面開
巍城穹閣信雄哉
眼中孤鷺雲邊沒
望裏長江檻外來
蛟蜃圖成春未晚
柘枝筵動客多才
休論今古興亡事
時倒金尊醉一回

秦山洞

秦人當日避風煙
自種桑麻老洞天
綠竹橫溪雞犬靜
不知門外漢山川
以上江西通志

胡宗炎

宗炎字彥聖
宿子舉進士
徽宗朝官至直龍圖

閣知穎昌府

句

飛禽避軒蓋殘果落莓苔

娛書堂詩話此二句歐陽公深賞之
宋史本傳宗炎為詩藻思清婉歐陽修守毫與
客游郡圃或誦其詩修賞味不已以為有鮑謝
風致

李中師

中師字君錫開封尹

奉別堯夫先生承見留數刻漬梅酒磨沈水飲別

聊書代謝

磨湯漬酒重分攜
景霽風和二月時
莫忘天津別君處
黃梅庭下半離披

擊壤集附

陳大雅

大雅張表臣外祖

絕筆

胡柳陂中過令人念戰功
兵交千騎沒血漂一川紅
朱氏皆豚犬唐家盡虎龍
壯圖成慷慨擲劍向西風

珊瑚鉤詩話外祖陳公大雅為人剛果文章似之再舉不第能詩為趙清獻所知踰八十乃死死翌日復蘇索筆題詩云云題畢乃逝味其言豈葛從周王彥章之徒歟

陳知默

句

平地風煙橫白鳥
半山雲木卷蒼藤
雲埋山麓藏秋
雨葉脫林梢帶晚風

王直方詩話田承君云歐陽公晚年最喜陳知默詩至云修方且欲學之陳詩不多但見兩聯

張洵

蒙亭倡和長句

嘉祐中經畧吳公及即伏波巖之左以為亭名蒙漕
使李公師中記之而饒於巖之崖亭久埋廢記亦湮
滅紹聖改元龍圖閣胡公宗回帥桂林憲使梁公出
其家藏蒙亭記以觀由是知其亭之詳胡公斥基而
新之遂為殊偉之雄觀

桂林山水冠衡湘蒙亭正在灘水旁清流洄洑眩波光
高崖古木爭蒼蒼下有菱荷滿橫塘面面風來面面香

新詩一詠酒一觴爽氣渾如秋氣涼酒闌巖下踞胡牀
汲泉煮茗沈煙長從容談笑聲琅琅水光山色增輝芒
東山蘭亭各一方風流兼追謝與王回頭塵事皆茫茫
為計不若行樂良恨我到此情難忘遙指白雲思故鄉

粵西詩載

尚用之

和韻

江亭勝概冠三湘仁智所樂皆其旁翠岫俯映青蘿光

上有喬木摩穹蒼亭下川遊覆銀塘水面風來笑語香
騷人相值喜飛觴雄辯清談五月涼飲餘相與坐方牀
論文日暮興何長佳篇疾讀韻琅琅真疑星斗煥光芒
格高調古說奇方況復筆法追二王事業無窮歎茫茫
丹鉛點勘策非良與公致道心可忘浩歌直造無何鄉

粵西詩載

呂源

和韻

九溪灘水接瀟湘萬壑千崑羅水旁七星高聳生輝光
連天一色皆蒼蒼倚江景物似錢塘況有萬戶新醅香
古洞相對笑舉觴文淵遺迹徒悲涼安得石枕與藤牀
夢想昔人風味長滿車惹勝琳琅流傳千載事微芒
男兒生即志四方將軍異代猶封王感時撫事心茫茫
顧我豈有籌策良報國志願不敢忘此身未暇歸江鄉

粵西詩載

李彥

和韻

桂江繚繞通湖湘佳山四插江之旁嵐光滴翠漾波光
岸頭秀木皆青蒼誰人築室枕西塘新荷敲風柄柄香
君嘗招我來攜觴登臨樂臆生清涼倏思伏波離空牀
且及尊前飲興長紛劇雄辯聲何琅客傳俗事江亭芒
蠻歌蜚曲笑遐方應無夢怪楚襄王但驚歲月去茫茫
報國宜多為畫良功名未白何時忘此心疇敢憶家鄉

粵西詩載

葉宗嚮

和韻

我行幾許踰沅湘直抵八桂灘水旁千山倒影搖溪光
秀色不借草木蒼茲亭構勝俯回塘野花風遞羅綺香
崑前伏波航羽觴一洗塵思生清涼疑有仙人白玉牀
壺中景迴日月長步此仙籟音琅琅世間名利真毫芒
此景不獨冠南方恨不築室輕侯王回首塵迹空渺茫
瞥去未必計非良其如樽酒情難忘恍然一夢五雲鄉

粵西詩載

崔唐臣

唐臣閩人

書刺末

集賢仙客問生涯
買得漁舟度歲華
案有黃庭尊有酒
少風波處便為家

避暑錄話唐臣與蘇子容呂晉叔同學相好二
公先登第唐臣遂罷舉久不相聞嘉祐中二公
在館下一日忽見艤舟汴岸坐於船窗者唐臣
也亟就見之邀與歸不可問其別後事曰初倒

篋中有錢百千以其半買此舟往來江湖間意所欲往則從之以其半居貨間取其贏以自給粗足即已差愈於應舉覓官時也二公相顧太息而去翌日自局中還唐臣有畱刺乃攜酒具舟往謁之則舟已不知所在矣歸視其刺未有細字小詩云云訖不復再見

章友直

友直字伯益得象族子嘉祐中與楊南仲篆石經於太學除將作主簿不就

書史會要章氏煎友直之女工篆書傳其家學友直執筆自高壁直落至地如引繩而煎亦能如其父以篆筆畫棋盤筆筆勻正縱橫如一

和祖擇之咏震山巖彭徵君釣臺

唐宜春彭構雲
隱處

巖因更號震山居臺上猶存舊釣磯一派滄浪真隱處

澄清尚可濯塵衣

祖龍學集附

陳烈

烈字季慈候官人少以鄉薦詣闕不第與陳襄
周希孟鄭穆稱海濱四先生嘉祐中以薦除國
子直講元祐中詔為本州教授卒

題福唐津亭

溪山龍虎蟠溪水鼓角喧中有鄉夢破六月夜衾寒風
雨生殘樹蛟螭喜怒濶殷勤祝舟子移櫂過前灘

皇朝類苑陳烈嘗與蔡君謨同硯席時君謨出
鎮福唐東吏治民毫髮不容一日烈往見之維
舟亭下聞其嚴察不往謁但留詩云云吏不敢
隱錄詩呈公自是少霽威校

題燈

富家一椀燈太倉一粒粟貧家一椀燈父子相聚哭風
流太守知不知唯恨笙歌無妙曲

淳熙三山志元豐中劉待制瑾為守元夕不問
貧富每户科燈十盞陳先生以詩題鼓門大燈

龍云云瑾聞而謝之

蔡準

準仙遊人京之父官郎中

來賢巖

在大滌洞秀峯之前東坡倅杭同準等七人來遊賦詩故號來賢

大滌洞沈沈天柱風葉葉人世悲落花巖松無易葉朝
夕樵風生雲鶴閒情愜何當采玉芝仙蹤從此躡

洞霄詩集

彭汝礪

汝礪字器資鄱陽人治平二年進士第一元豐

初提點京西刑獄哲宗朝再選中書舍人進權
吏部尚書言者謂附會劉摯出知江州有鄱陽

集

寄君時四章章四句

我脂我車陟彼高岡母也吾懷匪居或忘

我帆我舟汎彼大江母也吾憂食匪或遑

我池有魚亦可以羹何必鮪及魴叔兮其歸哉

我田有菽苟可以食何必稻與梁叔兮其歸哉

送宗文先輩

夫子聲名二十年塵埃嘆息欲華顛
相如舊有凌雲賦靖節今無種秫田
南國寂寥歸見鴈北風悲壯屢聞蟬
思量世事真如幻合置窮愁頓酒邊

二月己亥曉出代祀高禩

塵沙騎馬聽溪流淡薄春風卻似秋
坐憶洞庭波萬頃灘聲長在釣魚舟

塵土冥冥二月風寥寥天外有歸鴻
松陰想見芝山路

隔浦溪花岸岸紅

泊真州新河亭

鬢毛垂雪欲毵毵
道路風波老不堪
繫纜短亭聊自慰
青山數點見江南

燕姬

有女天天稱細娘
真珠絡臂面塗黃
南人見怪疑為瘴
墨吏矜誇是佛裝

張舜民使遼錄婦人以黃物塗面謂之佛裝

雞肋編北方士族女子冬月以括萋塗面謂之
佛裝但加傅而不洗至春暖方滌去久不為風
日所侵故潔白如玉也

燕

一雙掠水燕來初萬點飛花社雨餘辛苦成巢君勿笑
從來吾亦愛吾廬

湖湘道中見梅花

滴葉開花妙入神酥盤憶看北堂春瀟湘此日堪腸斷
隨處幽香著莫人

以上鄱陽集

舒 亶

亶字信道明州慈谿人治平二年進士試禮部
第一神宗朝為御史中丞徽宗朝累除龍圖閣
待制有集

村居

水遶陂田竹遶籬榆錢落盡槿花稀夕陽牛背無人臥
帶得寒鴉兩兩歸

墨莊漫錄

題慶安寺

門前屏障遶潺湲付與林僧夜定還松蓋作雲遮十里
竹龍行雨出千山白公香火蓮開後謝氏池塘草夢閒
我亦鳳凰臺上客圖閒卻笑未能閒

陳郁話腴

和馬粹老四明雜詩

百粵喧華外三江指顧中耕桑遺俗在草木故城空

即郭也

近澤知田美

俗重近澤田

多魚驗海豐由來形勢地越絕控遼東

箔蠶迎豆熟

俗有蠶豆

江雪伴梅消抵虎螯經夏

里語八月蟪蛄可抵

虎跳沙蛤趂潮

里語有跳沙蛤

酒罌雙印貴

俗重雙印酒

藥肆萬金

饒

謂馮樓也

未覺西風遠三溪好采樵

慈溪小溪藍溪也

巷陌隨橋曲閭閻占水窮郡樓孤嶺對

古謂鎮明樓

市港兩

潮通

閘在城東隅

春暖雞鳴嶼

在慈谿

秋寒鴨信風

江湖所呼

家家

人富足擊壤與吾同

稻飯雪翻白魚羹金鬪黃鮓埼千蚌熟

在奉化

花嶼一村

香

在慈谿

海近春蒸溼湖靈夜放光

廣德湖每現光采

北窗休寄

傲大隱即吾鄉

大隱山乃楊適先生所居四明圖經

以上乾道

詠蔗

瑤池宴罷王母還九芝飛入三仙山空餘絳節留人間
雲封露洗無時間節旄落盡何爛斑野翁提攜出茅菅
吳刀戛戛鳴雙環截斷寒水何潺潺相如賦就空上林
倦遊渴病長相侵劉伶愛酒真荒淫狂來欲倒滄溟深
此時一嚼輕千金壚邊何用文君琴五斗一石安足斟
坐想毛髮生清陰蕭瑟甘滋欲誰讓檀梨橘柚紛殊壯
冷氣相射杯盤上顧郎不見休惆悵佳境到時還不妄
詩成雖媿陽春唱全勝乞與將軍杖

合璧事類集

和石尉早梅

霜林盡處碧溪傍，小露檀心媚夕陽。
天下三春無正色，人間一味有真香。
相思誰向風前寄，更晚那辭雪後芳。
朝夕催人頭欲白，故園正在水雲鄉。

瀛奎律髓

湖心寺

吹落清香縹緲風，樓臺彷彿水邊紅。
人間誰是丹青手，畫取春湖細雨中。

崇福寺

龕燈隱隱夜初分
落果猿啼枕上聞
客夢欲成成不得
一窗殘月半牀雲

題太白峯

千峯下視盡兒孫
仙事寥寥不可聞
長作人間三月雨
請看膚寸嶺頭雲

以上延祐四明志

句

春禽得意千般語
澗草無名百種香

墨莊漫錄

游師雄

師雄字景叔京兆武功人治平二年進士授儀
州司戶參軍趙高帥延安辟為屬朝廷使與邊
臣措置破洮州擒鬼章為陝西轉運副使除直
龍圖閣攝帥熙河移知陝州卒有集

賀岷州守种誼破鬼章二首

王師一舉疾於雷頃刻俄聞破敵迴且喜將門還出將
檻車生致鬼章來

圍合洮州敵未知煙雲初散見旌旗忽驚漢將從天下

始恨羌酋送死遲

陝西通志

孫升

升字君孚高郵人治平二年進士元祐中歷侍
御史中書舍人天章閣待制知應天府紹聖中
謫汀州安置卒名入黨籍劉延世嘗從升游錄
其言論為孫公談圃

送鄭待制閤中歸閤

清曉都門祖帳開
路人相與歎賢哉
流塵幾翳看山眼

落日休停別酒杯何待諸生留北闕自存遺直在東臺
連江四老嗟誰在白首今朝只獨來

孫公談圃鄭待制穆字闕中福州人與劉彝陳裏皆以德行為世所重號四先生鄭歸闕公有

詩送之

宋史鄭穆傳元祐五年穆為祭酒以寶文閣待制請老給事中范祖禹言古者大夫七十而致仕有不得請則賜之几杖祭酒居師資之地正宜處老成願毋聽其去不報太學之士千餘人以狀詣宰相請留亦不從於是公卿大夫各為詩賦贈行空學出祖汴東門外都人觀者如堵數未嘗見

索劉述之新釀

稍覺香熏鼻還思酒入脣盈缸止三斗可撥甕頭春

孫公

談圖

句

玉筍千官散珠簾一夜空

宣仁后挽詞

來書占喜鵲落日聽

鳴蜚

峽口送人

若與蛟龍爭角黍應同漁父啜糟醕

屈原宅

睡

須山鳥喚酒聽竹枝斟

述懷

窮搜詩句熟老練世情通

長陽

道中

白雲每逐晨光出紅鶴長隨暮靄還

袁州道中

梁臺歌吹

餘衰草湓浦琵琶悵晚風

自南京和彭九江

慈竹筍抽疑夏籜

木犀花發認春香

在汀州作

孫公談圃公嘗學詩於孫莘老嘗曰近世作詩
無復有唐人風余嘗得公詩今畧誦數聯云云
在汀州避謗不作詩有一聯道盡汀州景物

練
必

必延平人治平二年進士元祐初知旌德縣雅
負清操民間凡飲酒清者輒稱練長官

鳧山廟

雲煙深處路縈紆元是真人舊隱居我亦放情丘壑者

官閒時得命藍輿

寧國府志

羅適

適字正之台州寧海人治平二年進士官提點
兩浙京西刑獄有赤城集

送致政太師文潞公

曾將故老較量看五福如公信是難潞國封來多有歲
太師以上更無官應留妙算安神器必得人才薦將壇
他日宋家青史上始終臣節雪霜寒

瀛奎律髓

試筆

金門秃筆積如山黃閣磨煤夜不乾試借薦賢書彙看

應無一字及孤寒

前賢小集拾遺

過遠橋

長憶西橋避暑時天風六月襲人肌水隨地脈來無盡
雲過山頭去不知拂面稚松應偃蓋當年遊子已龍眉

憑師莫動溪邊石留與東歸題好詩

台州府志

孔平仲

平仲字毅父治平二年進士元祐中提點京西
刑獄坐黨籍安置英州徽宗即位召為戶部員
外郎遷金部郎中出使陝西帥鄜延環慶奉祠
卒

孔平仲談苑院中有雙鵲栖於玉堂之後海棠
樹每學士會食必徘徊翔集或鳴噪必有大詔
令或宣召之事因謂之靈鵲故晁翰林詩云卻
聞靈鵲心應喜并予詩云靈鵲先依玉樹栖蓋
謂此也

泛漣水

漣漪二十里清淡得我性微風不復搖天水相與淨秋
容入崖柳晚色依漁艇髣髴會稽遊南湖似明鏡

出城

駐馬河之西送車皆已返郊原人漸少風物秋將晚身
如獨鳥輕意與青山遠

寄內

試說途中景方知別後心行人日暮少風雪亂山深

以上

清江三孔集

藥名體

鄙性常山野尤甘草舍中鉤簾陰卷柏障壁坐防風客
土依雲實流泉駕木通行當歸去矣已逼白頭翁

此地龍舒骨池隍獸血餘木香多野橘石乳最宜魚古
瓦松杉冷旱天麻麥疎題詩非杜若牋膩粉難書

茗溪
漁隱

叢話

句

斜拖闕角龍千尺淡抹牆腰月半棱

館中咏雪
夜話

冷齋

葛 閱

閱治平三年以職方郎中知台州

顯孝南山寺

在臨海縣

六時香火集宗雷日上雲收紫翠開應笑守麾公暇少

二年官滿一曾來

台州府志

常 秩

秩字夷甫潁州汝陰人屏居里巷以經術稱屢授以官不受神宗即位三使往聘始詣闕拜右

正言判國子監進寶文閣待制卒贈右諫議大夫

句

凍殺汝陰常處士也來騎馬聽朝雞

石林詩話常待制秩居汝陰與王回深父皆有
盛名於嘉祐治平之間屢召不至雖歐陽文忠
公亦重推禮之其詩所謂笑殺潁川常處士十
年騎馬聽朝雞者是也熙寧初荆公當國力致
之遂起判國子監太常禮院聲譽稍減於前嘗
一日大雪趨朝與百官待漏於仗舍秩已來寒
甚不可忍喟然若有所恨者乃舉文忠詩以自
嘲云云

許安世

安世襄邑人顓之世父治平四年進士第一為

都官員外郎卒於黃州

詠史

天下有誅賞固非君所私太宗泣君集意恐勞臣疑至

公一以廢智術相維持哀哉功名士汲汲尚趨時

許彥周詩

話

張景修

景修字敏叔常州人治平四年進士元祐末浮
梁令兩為憲漕五領郡符大觀中遷祠部郎中
詩幾千篇號張祠部集

寄葉

原闕

自湖南憲請宮祠歸

葉夢得大父也

聞說年來請洞霄江湖奉使久勤勞有神仙處閒方得
用老成時退更高借宅但須新種竹尋仙想見舊栽桃
浮梁居士塵埃甚鬚鬢而今也二毛

石林燕語

送朱天錫童子

黃金滿籬富有餘一經教子金不如君家有兒不肯娛
口誦七經隨卷舒渥洼從來產龍駒鸞鷟乃是真鳳雛
一朝過我父子俱自稱窮苦世為儒雪窗夜暝孫康書
春隴晝荷兒寬鉏翻然西入天子都出門慷慨曳長裾
神童之科今有無談經射策皆壯夫古來取士凡數塗
但願一一令吹竽甘羅相秦理不誣世人看取掌中珠
折腰未便賦歸歟待君釋褐還鄉閭

中吳紀聞初景修為浮梁縣令作此詩天錫既
到闕忘取本州公據為禮部所卻因擊登聞鼓

繼景修詩為證神宗大稱賞之翌日以語宰相
王珪而恨四方有遺材即令召對珪言不欲以
一詩召人恐長浮競不若俟其秩滿然後擢用
之遂止令中書籍記姓名比罷官而神宗已升
遐矣景修歷事三朝每登對上必問聞卿作朱
童子詩試為舉似由此詩名益著

貧居

茅檐月有千錢稅稻飯年無一粒租生事蕭條人問我

水芭蕉與石菖蒲

中吳紀聞

睡香花

曾向廬山睡裏聞香風占斷世間春竊花莫撲枝頭蝶

驚覺南窗半夢人

能改齋漫錄廬山瑞香花天聖中始傳張祠部以瑞為睡其詩云云

游九鎖

九鎖山中多隱仙
洞門終古掩雲煙
茶生東塢偏迎日
松老西巖不記年
翠箬久藏千歲藥
碧池終納半山泉
蒼崖縱使秦驅得
未信能移一柱天

洞霄詩集

更高亭

在浮梁縣

稚子山妻伴老翁
重陽尋徧菊花叢
明年把酒知何處

卻憶高亭是夢中

饒州府志

句

洗竹放教風自在傍溪看得月分明

題集清軒紀聞

中吳

蔣 槩

槩字康叔江西龍泉人治平間進士

登權州北門

壯士未酬志乘秋感慨多幽燕新種落秦漢舊山河塞
月沈青冢邊聲起白波如何得萬騎玉壘夜經過

詩話總龜

徐積

積字仲車楚州山陽人治平四年進士授楚州教授事母極孝政和中賜諡節孝處士有集

茗溪漁隱叢話東坡云仲車古之獨行也於陵仲子不能過然其詩文則怪而放如玉川子此一反也耳贖甚畫地為字乃始通語終日面壁坐不與人接而四方事無不周知其詳雖新且密無不先知此二反也

淮之水示門人馬存

淮之水淮之水春風吹春風洗青於藍綠染指魚不來

鷗不起潏潏灩灩天盡頭祇見孤帆不見舟殘陽欲落
未落處盡是人閒今古愁今古愁可奈何莫使騷人聞
權歌吾曹盡是浩歌客笑聲酒面春風和

愛愛歌

吳越佳人古云好破家亡國可勝道昨日閒觀愛愛歌
坐中歎息無如何愛愛本是娼家女金魂玉魄沈塵土
歌舞吳中第一人綠鬢雙鬟纔十五耳聞目見是何事
不謂其人乃如許操心危兮勵志深半夜窗前淚如雨

假饒一笑得千金何如嫁作良人婦桃李不為當路花
芙蓉開向秋風渚忽然一日逢張氏便約終身不相棄
山不磨兮海可枯生唯一兮死難二有如樗櫟叢中木
忽然化作瀟湘竹又如黃鳥春風時遷喬林兮出幽谷
文君走馬來成都弄玉吹簫從幾曲不聞馬上琵琶聲
忽作山頭望夫哭去年春風還滿房昨夜明月還滿牀
行人一去不復返不念關山歧路長前年猶惜縷金衣
今年不畫深顰脂今年今日萬事已鮫鮪翡翠春如泥

一女二夫兮妾之所羞不求所事兮志將何求蛾眉皓齒兮妾之所憂不如無生兮庶幾無尤嗶嗶草蟲趯趯阜螽靡不有初鮮克有終鴛鴦于飛兮畢之羅之人間所恨兮何休時深山人跡不到處病鸞斂翼巢空枝

麗情集楊愛愛錢唐娼女也垂髫喜歌舞初學胡琴數曲遂通他調七月七日泛舟西湖採荷香為金陵少年張逞所調相攜潛遁旅于京師逾年逞為父捕去愛留巷中好事者百計圖之不可得念逞之勤感疾而死

貧女扇

妾有一尺絹以為身上衣自織青溪蒲團團手中持朝
攜麥隴去暮汲井泉歸無人不看妾不使見蛾眉

釣者

有人口誦浮雲曲手把瀟湘一竿竹荻花洲上作茅庵
坐看江頭浪如屋

以上節孝先生集

章 案

案字質夫浦城人得象之姪治平四年進士甲
科哲宗朝歷集賢殿修撰知渭州進端明殿學

士徽宗立拜同知樞密院事授資政殿學士中
太乙宮使卒諡莊簡

運司園亭詩

并序

存三首

成都轉運司園亭蓋偽蜀時權臣故宅也清曠幽靜
隨處皆有可樂者輒為十詩粗記領畧以備他日遺
忘庶幾讀其詩足以省憶髣髴云爾

西園

古木鬱參天蒼苔下封路幽光無時歇醜石終朝踞水

竹散清潤煙雲變晨暮何必憶山林直有山林趣

玉谿堂

堂因水得名方沼當其後漪瀾蕩漾桷窗戶挹花柳蟲魚不避人鷗鷺若相友午枕夏簟涼此樂亦奚有

小亭

花邊二小亭雙跨清渠上規模雖甚隘幽僻良可賞信依佳木陰未羨大廈廣不足延賓朋攜筇常獨往

以上成都

文類

楊 怡

成都運司園亭詩

和章質夫

西園

池臺密相望曾是故侯宅賞心知幾人喬木已百尺低
花拂烏帽古蘚駁蒼石欲問昔豪華秋風掃無迹

小亭

方亭惟四柱對峙花竹閒下有雪嶺水淙流日潺潺宛
如雙綵舸纜向春波灣欲起江湖心而柰風濤艱

以上成都

文類

鄒極

極字適中宜黃人治平四年進士擢度支員外
郎除江西提刑丁外艱服除丐祠得洪州玉隆
觀自號一翁有宜川集

石砦潺湲亭

宜黃縣南二十里石梁數十丈橫空
跨於兩崖曰石砦

危亭跨幽澗澗水日潺湲響與鼓鐘應靜無車馬喧布
金因利物漱玉自澄源練引千尋遠珠輕萬斛繁倚空

橫石壁夾岸帶山樊漲駭天河決湍流地軸翻僧棲真
夢覺客至滌塵煩不盡登臨意忘言魏有言撫州府志

江公著

公著字晦叔睦州建德人治平四年進士歷提
點湖南刑獄京西轉運使

久旱微雨作

雲葉紛紛雨腳勻亂花柔草長精神雷車卻碾前山過
不灑原頭陌上塵

能改齋漫錄江公著初任洛陽尉作久旱微雨
詩司馬文正公見之修刺謁江且為稱薦由是
知名

胡時中

時中字伯正永州人治平中進士

清明行

憶昔父母康健時清明攜我上丘壠如今清明我獨來
卻將小兒拜先冢凝情東風淚滿衣江山雖是昔人非
兒兒問我悲何事此意他年汝自知

前賢小集拾遺

陳 繹

繹字和叔開封人舉進士神宗朝歷祕書監集
賢學士知廣州貶建昌軍

碧溪軒

在建昌軍壽昌寺

蕭疎華薄隱山村清淺浮桁帶郭門竹倚闌干水邊寺
興來題作碧溪軒

輿地紀勝

羅尚友

尚友字明善萍鄉人治平四年進士授鄂州軍

事推官

句

人間酒客兼詩客
天上文星與將星

謁閣門使蕭注令
賦袁州府志

毛漸

漸字正仲衢州江山人
治平四年進士哲宗朝
歷陝西轉運使攝涇原帥
進直龍圖閣待制

桃源洞

洞門流水日潺湲
桃塢依然枕水邊
春色年年花自好

遊人誰復遇嬋娟

天台山志

鄭俠

俠字介夫福州福清人治平四年進士神宗朝
調光州司法參軍入京監安上門坐上書詆王
安石呂惠卿謫英州編管徽宗即位除監潭州
南嶽廟卒自號一拂居士入黨籍有西塘集

苞苴行

苞苴來苞苴去封書裏信不得住君不見箕山之下有

仁人室無杯器以手捧水不願風瓢挂高樹

煙雨樓

仙人居處即鼇宮更作層樓峭倚空羣岫西來煙漠漠
大江南去雨濛濛花鑣柳策熙怡裏耘笠漁蓑笑語中
別有夜楹千里月凭闌清興與誰同

以上西塘集

和王荊公何處難忘酒

何處難緘口熙寧政失中四方三面戰十室九家空見
佞眸如水聞忠耳似聾君門深萬里焉得此言通

翠屏
筆談

曾肇

肇字子開易占子布弟牟阜嘉祐二年宰六年
肇治平四年皆舉進士初調黃巖尉用薦擢崇
文校書累遷國史編修官元祐初擢起居舍人
徽宗即位遷翰林學士安置汀州歸潤州卒諡
文昭入黨籍有曲阜集西掖集

題王晉卿所藏鄭虔著色山水圖

曾訪江南鳥爪仙
悞隨塵網落人間
紅泉碧澗春風裏

尚記麻源谷口山

上王荊公墓

天上龍胡斷人間鵬鳥來未應淮水竭所惜泰山顏華
屋今非昔佳城閉不開白頭門下士悵望有餘哀

海陵春雨

知泰州時作

公事無多使客稀兩時衙退吏人歸沈煙一炷春陰重
畫角三聲晚照微桑雉未馴慚報政海鷗相近信忘機
只將宴坐收心念嬾向人間問是非

靈壽同年兄再以杞屑分惠復成小詩以代善謔
場屋十年長鈴齋一笑歡微言師水齏交分托金蘭腹
飽仙人杖心存姹女丹他時玉京路同綴侍宸官

寄呂南公

主人第一河南守之子無雙江夏才會見吹噓上雲漢
可能憔悴隱蒿萊風騷寓興垂金薤翰墨傳家富玉杯
傾蓋相知勝白首扁舟臨別重徘徊

滁州瑯琊山茶仙亭

山僧獨好事為我結茅茨
茶仙榜亭中頗宗樊川詩

題多景樓

屈曲危樓倚半空
詩情無限景無窮
江聲逆順潮來往
山色有無煙淡濃
風月滿樓供一醉
乾坤萬里豁雙瞳
片雲迴逐斜陽去
知落淮山第幾重

以上曲阜集

邇英閣侍講筵作

哲宗元祐中

二閣從容訪古今
諸儒葵藿但傾心
君臣相對疑賓主
誰識昭陵用意深

邇英閣前槐後竹雙槐極高而柯葉拂地狀如龍
蛇或謂之鳳尾槐

鳳尾扶疎槐影寒龍吟蕭瑟竹聲乾漢皇恭默尊儒學
不似公孫見不冠

以上墨莊漫錄

句

鼎湖弓劍仙遊遠渭水衣冠輦路新
階除翠色迷宮
草殿閣清陰老禁槐

庚溪詩話元祐間東坡與曾子開同居兩省扈
從車駕赴宣光殿子開有詩其畧云云語亦佳

何平仲

平仲合州人

聞周茂叔中年有嗣以詩賀之

慶門崇構已多時五百年方是此期樹長瓊枝生較晚
珠根驪頷得來遲桓溫貴骨天然別韋相傳經道不衰
衡岳維高湘水闊共知長與福為基

漁溪集附

劉恕

恕字道原筠州人渙子舉進士英宗朝司馬光

編次資治通鑑薦為局僚官至祕書丞卒

題靈山寺

早晚報衙蜂擾擾友朋相和鳥關關餘香滿袖花驚眼

空翠霑巾雨暝山

西江詩話


費琦

呈謝通判殿丞寵示遊山之作

夫君落筆盡珠璣不比相如意思違從此洛陽須紙貴

夜來新有愛山詩

瀟溪集附



宋詩紀事卷二十三